



重編東坡先生外集卷第二十五

啓狀

密州賀青州陳龍圖啓

伏審光奉詔書往司留憲漢恩予告暫優三最之勤
商憂懷人方徯巨川之濟於公自計爲喜可量伏惟
某官文武憲邦忠嘉致主衆謂老成之託孰逾舊學
之賢而乃力謀退安示有疾病揮金故里雖榮疏傳
之歸雅意本朝日望蕭公之入無由追餞徒切瞻依

徐州謝隣郡陳彥升啓

受代膠西甫違仁庇分符泗上復託恩私祗見吏民

東坡先生文集 卷之二十一
布宣條教郡有溪山之樂庭無爭訟之煩曾何妄庸
獲此僥倖此蓋某官紀綱千里儀表一方議論信於
中朝予奪公於多士衰罷無術既嘗荷於兼容勉勵
自將或無忝於知遇感懼之素敷染難宣

上執政謝獎諭啓

事有服勤此實守臣之職功無可錄遽膺褒詔之榮
聞命惟驚反身自愧伏自河失故道遺惠及於東方
徐居下流受害甲於他郡比緣衆力獲保孤城灑沉
澹災無補洪源之塞增卑培薄僅循下策之施敢圖
天聽之卑乃辱璽書之賜茲蓋某官左右元聖師保
萬方以一夫不獲爲已羞故衆人皆樂以善告遂
過聽致此曲恩軼敢不祗服訓詞益修吏職深自策
其駑鈍庶有補於涓埃過此以還罔知所措

謝諸秀才啓

鹿鳴食野方主禮之粗陳驪駒在門歎賓歡之莫盡
遽辱移書之重益慙爲具之踈卽遂遠言徒增銘佩
賀冬啓

效五物以觀雲咸知歲美備八能而合樂益驗人和
伏惟某官進德及時宜民美祿肇履三陽之應永膺
百順之歸未遂披承徒增欣詠

東坡先生外集卷之二十三
又
三陽應律萬寶向榮永惟視履之祥宜擁自天之祐
未皇展慶徒切頌言

賀孫樞密啓

伏審對揚綸綍進領樞機道不虛行必賴股肱之力
人惟求舊允符夷夏之瞻恭惟某官德充山甫之將
明氣備孟軻之劄大聲華傾於衆望功業見乎有爲
擁節常山遠過長城之備剗繁京兆遂令鳴鼓之稀
公義益崇貴名愈白用效非常之命以圖保大之勳
惟時運籌旣壯王猷之志觀秉軸更增帝載之
某限以郡符阻趨墻仞欣抃之至徒切下懷

回監司啓

伏念傾蓋若故雖自慰於宿心盡言非書固未紓於
誠意卽膺寵復實佩謙光退屬紛紜遂踈上記遠叨
榮問徒益厚顏恭惟某官造道惟深養氣以直理財
不愆於義行法不失其恩竊聆下風倍仰厚德不圖
幸會遽吏屬封吏畏民懷旣仰安於明哲心勞政拙
庶粗免於譴訶喜抃至深敷陳莫罄煩歆尚熾恭對
未期伏冀精願別卽迅召

賀交代趙祠部啓

東坡先生集卷之二十五
近審新命屈領此邦名實所加吏民交慶夫何驚蹇
之步偶茲糠粃之先雖甚內慙寔爲天幸恭惟某官
清名肅物雅望在人以博學而濟雄文以高才而行
直道久試蕭生於馮翊猶煩長孺於淮陽眷此東原
幾爲大澤尚呻吟之未復豈罷陋之所堪望公之來
以日爲歲祝頌之素寫述難周

湖州上監司先狀

弭棹江郊聳聞風采馳神德宇若奉誨音欣抃之深
敷宣莫究

回同官先狀

幸因聯事得遂依仁瞻奉匪遙欣愉良極

黃州還回太平守畢仲遠啓

五年嚴譴已甘魚鳥之鄉一舸生還復與縉紳之末
屢將通問輒復自疑方茲入境之初遽承誨音之辱
披緘驚眩撫已汗惶恭惟某官師帥斯民表儀多士
道德龔黃之右牢固坐空風流王謝之間嘯歌自得
豈特居人之安堵固將遷客之忘歸路轉湖陰益聽
風謠之美神馳鈴下如聞警咳之音瞻詠實勞敷宣
罔旣

罷登州謝杜宿州啓

桑榆晚景忽蒙收錄之恩山海名邦得竊須臾之樂
自非明哲少借餘光內自顧其空疎必難逃於曠敗
此蓋某官高風肅物雅望映時旣豈弟以宜民亦儒
雅而飭吏每假齒牙之論曲成羽翼之私感佩良深
敷述奚旣

除起居舍人謝啓

比者誤被聖恩軫及微物起於貶所付以名藩牧養
疲民曾未施於薄效跡扳近侍已再被於寵光祿旣
多則功不可微職旣崇則責尤爲重願懇辭之不獲
念圖報之未能方以爲優敢辱見慶恭惟某官德爲
樂善志務達人前緣姻好之私賁以文詞之美捧讀
數四第增愧慙屋春候之向和宜福祿之益固未遂
披奉但切傾懷

賀孫舍人啓

拜命中宸代言而披聳聞中外交慶士夫竊惟二聖
之心蓋以多士爲急滅烽什鼓而以將帥爲藩垣抵
璧捐金而以公卿爲帑廩蓋樽俎有折衝之恃則藜
藿無見採之憂某官瑚璉之資杞梓其用學不專於
爲已才已效於臨民穆如清風草木皆靡炳然白日
霰雪自消茲爲收拾之儲豈特絲綸之任不遺衰朽

過辱緘封永敦爲好之懷深負難酬之雅

賀曾舍人啓

期膺帝命榮進掖垣風聲所加中外同慶伏以取才之道自昔爲難惟君子之所爲固衆人之莫識奢儉異俗不害徐公之有常用舍皆天孰知令尹之無喜此蓋某官異才秀出博學名家世以文鳴追繼父兄之業早緣德進簡在裕陵之心今乃援而進之論者惜其晚矣訓詞一出皆丹青潤色之文老拙自降有糠粃在前之歎過蒙寵顧辱示華牋愧無酬德之言徒有得人之慶感抃之素爲述奚周

回喬舍人啓

軾聞人才以智術爲後而以識度爲先文章以華采爲末而以體用爲本國之將興也貴其本而賤其末道之將廢也取所後而遺所先用捨之間安危攸寄故議論慷慨則東漢多狗義之夫學術浮夸則西晉無可用之士興言及此太息隨之元祐以來真人在位並興多士以出異才眷言淮海之英久屈江湖之上迨茲顯擢實慰輿情伏惟某官名重儒林才爲國器深厚爾雅非近世之時文直諒多聞蓋古人之益友代言未幾華國著稱豈惟臺省之光抑亦邦家之

慶過蒙流示深認撝謙願慙衰病之餘莫究欣承之意

賀呂學士書

文學之選人才所難迹無世祿之嫌遠絕衡茅之棄矧此國家養賢之地豈爲儒者竊位之私某官學古入官修身以道忠本爲已行浮於名直諒多聞固可追於益友文史足用曾不愧於古人果膺選掄益登清要未皇馳問先辱惠音

杭州到狀

得請支郡備員屬城幸茲衰病之餘託在庇庥之末卽詣瞻奉預切欣愉

杭州與英提刑啓

罷直禁中本緣衰病分符浙右更竊寵榮願惟頑鈍之資豈任煩劇之寄仰憑多可或賜曲全恭惟某官德望在人才猷簡上肅高風於列郡浹厚德於齊民千佛題名昔忝遊從之末三吳按郡想蒙潤澤之餘會見有期瞻依愈切

回胡秀州啓

初見吏民首行條教鄰封甚邇欣誼頌之藹然緘牘見貽愧勞謙之過矣伏惟某官望推朝論才映士林

用已試於盤根所居見紀政方觀於餘地不令而行
軾待罪江湖苟安衰病眷言數舍幸擊柝之相聞矜
式百爲知伐柯之不遠其爲欣詠難盡名言

賀王發運啓

伏審榮膺制檢總領漕權倅舒六路之民表裏大農
之政風聲所暨欣悚交懷伏惟某官學術過人忠嘉
許國暫屈分符之寄已膺側席之思乃眷東南欲少
蘇於疲瘵無心內外當益罄於謀惟凡在庇庥豈勝
歡慰

回蘇州黃龍旨啓

伏審光膺詔函移牧吳會先聲所被惠政已孚自顧
妄庸敢論疇昔旣聯法從之末又寵鄰光之餘金華
玉堂帝左右之高選武林茂苑江東南之要藩雖才
分濶絕於賢愚而步武差池於先後其爲喜幸宜倍
等流伏以某官文秀士林材任國器學已試而可用
望久養而益隆偃息均勞叔度莫窺於萬項治行稱
首次公行踐於三槐潤澤所加迂愚有託辱移書之
周厚寔借寵於衰遲銘感之深筆舌難喻

又

伏審政成京口召徙吳都眷惟疆境之隣首被風聲

之美亟蒙音誨良慰望思伏惟某官賦才敏明秉德仁厚踐揚臺省既久簡於上心偃息江湖尚歷試以民事卽膺殊用以協羣言欣頌之誠口占難盡

賀葉運使啓

伏承抗節入境揆日臨民方一節之風馳已列城之雲靡矧緣雅好尤激懽悰伏惟某官蚤以異材著聞美績望高郎選粲列星之經纏華使周爰凜外臺之風采自聞新命定慰輿情載惟衰朽之餘得荷寬明之庇其爲厚幸未易究陳

回葉運使啓

近審下車輒嘗進記徒欲聞名於將命未皇盡意以占詞不圖嫌光遽錫褒寵感銘旣切愧惕并深恭惟某官以舊德之賢當聖朝之選恩足以濟法義足以理財先聲所臨公議同慶凡繫屬部實有賴於鹿麻惟是孤蹤更曲蒙於優借此爲過幸豈復勝言

賀冬啓

候緹室之清宮警告以日卜觀臺之黃稜史書有年共安消長之來以待陰陽之定恭惟某官才猷俊異道德深醇靖共正直之休順獲天人之助軼格守官次阻稱壽觴坐馳傾向之心莫罄安榮之祝

回馬提刑啓

奉命按刑持節入境吏民相慶已頌二天之仁衰病
自私獨先一日之雅恭承榮問有激懦衷伏惟某官
才映士林望高朝論治行聳聞於中外家聲洋溢於
縉紳眷三吳之疲民困連歲之積潦疇咨明哲宣布
厚恩匪惟彫瘵之獲蘇抑亦庸虛之知免其爲喜幸
未易名言

荅高麗使副啓

觀光魏闕自忘浮海之勤授館吳都將有披雲之幸
過承謙德先在華緘感佩之深占言莫旣

祗率邦常來修方貢適此海隅之守得瞻使節之華
首辱緘滕過形謙抑其爲感忤難盡名言

謝高麗使副土物啓

揚舲造朝弭節就舍歸時事於宰旅方勞遠勤發私
幣於公卿亦蒙見及莫遑辭避但切感銘
館舍初定徒馭少休粗接賓歡方愧餽牽之陋曲敦
私好特分琛賚之餘感佩于懷愧忤無量

荅高麗使謝管設啓

裴回弭節少忘靡盬之勤笑語飛觴深懷不腆之愧
過承榮問益荷謙勤感服于衷口舌難盡

定州到狀

得請近藩假塗治境卽諧披奉預切忻愉

回列郡守倅石

祇奉詔恩出臨邊寄愧短才之難強託餘庇以少安
豈謂仁私過形存問感佩之至宜寫莫周

回列郡知通賀冬啓

日旋南極氣兆黃宮竊惟視履之祥宜擁自天之祐
未遑馳問先辱惠音感佩之誠敷述罕旣

回列郡守倅賀年君

新曆旣頒羣情交泰過蒙流問祇服寵光永惟嗣歲
之興必享宜民之祿徒深頌咏莫罄敷懷

謝惠生日詩啓

伏蒙某官以軼生辰特貽佳什允也風人之作粲然
華衮之榮自省庸虛惟知愧汗雖大人占斯千之慶
喜獲嘉言而弟子廢蓼莪之篇難忘永慕感佩之素
敷染莫周

回蔣發運啓

伏審上計入覲拜恩言還擁節西南尚寄一方之休
戚考圖廣內示將大用之權輿凡在庇庥與增抃躍
恭惟某官受材秀傑秉德純中蔚乎西漢之文深厚

爾雅展矣東京之吏悃悃無華雖已得正法眼於禪師然猶有大姻緣於當世行將入踐卿相坐致功名以斯道而結主知隨所遇而作佛事軼窳流已久衰病相仍方稱慶之未遑忽移書之見及欣幸之至筆舌難宣

定婚啓

里閭之游篤於早歲交朋之分重以世姻軼長子邁天資朴魯近憑一藝於師傳賢小娘子姆訓夙成遠有萬石之家法聊伸不腆之幣願結無窮之歡

又

敢議婚姻蓋恃鄉閭之末遂忘閥閱亦緣聲氣之同龜筮既從祖考咸喜伏承令子第二小娘子慶闈擢秀豈獨衛公之五長而軼第三子過駑質少文庶幾南容之三復恭馳不腆之幣永結無窮之歡

求婚啓

結縭早歲已聯昆弟之姻親垂白南荒尚念子孫之嫁娶敢憑良妣往款高閥軼長子某之第二子符天質下中生有蓬麻之陋祖風綿邈庶幾弓冶之餘伏承故令弟子立先輩之愛女第十四小娘子稟粹德門教成家廟中郎墳籍之付豈在他人太真姑舅之

東坡先生外集卷之二十五
婚復見今日仰緣夙契祇聽俞音

下財啓

夙緣契好獲講婚姻願門閥之雖微恃臭味之不遠
敬陳納幣之禮以行奠鴈之儀庶徼福于前人永交
歡於二姓

代賀歐陽樞密啓

代太中公

伏審拜恩王庭署事兵府非徒儒者之盛節實爲天
下之殊休苟居下風孰不欣抃切以國家分設二府
紀綱百官凡奉法循令所以撫民於內者皆效節於
中書秉義蹈忠所以扞城於外者皆受制於樞密未

有不能文而能幹兵事未有不知兵而能爲相臣才
雖或偏道未始異蓋述古之制兵農混於一民自漢
以還文武分爲二職所上者繫乎其世所長者存乎
其人求其兼通豈復容易恭以樞密侍郎名冠當代
才雄萬夫通習世務而皆有本原講明經術而不爲
迂濶擢居大位實快羣心武夫悍卒皆自以爲盡得
其才賢士大夫皆自以爲得行其道某分守遠郡寓
居近畿仰大賢之登庸助率士之歡詠

重編東坡先生外集卷之二十五終

東坡先生外集卷第二十六
重編東坡先生外集卷第二十六

青詞

醮北嶽青詞

少年出仕本有志於救人晚節倦游了無心於交物
眷其多罪憂患再罹飄然流行靡所歸宿仰止高真
之馭降於喬嶽之陽稽首投誠齋心悔過庶一念之
清淨洗千劫之塵勞妙用無方先解纏身之網靈光
所燭幸逢出世之師誓以此生永依至道

醮上帝青詞

報應如響天無妄降之災恐懼自修人有可延之壽

東坡先生集卷之三十六
敢傾微悃仰瀆大鈞臣兩遇禍災皆由滿溢早竊人間之美仕多收天下之虛名濫取三科叨臨八座少年多欲沉湎以自殘褊性不容剗復而好勝積爲咎厲遭此艱危臣今稽首投誠洗心皈命誓除驕慢永斷貪嗔纔不死於嶺南得退歸於林下少駐桑榆之暮景庶幾松柏之後凋

代子駿青詞

洪覆至神固不期於報謝羣生多故實有賴於祈禳竊輸悃悞之私仰瀆高明之聽伏念某遭逢盛際蒙被餘恩賦形宇宙之中殆將四紀竊祿江淮之上幾及二年身雖曲盡於勤勞事豈舉無於過誤慮愆之浸廣恐譴責之陰加粵自元朝當聿修於醮事及茲歲暮輒謹按於科文祇建壇場肅陳香火伏願上真保佑列神扶持宦路亨通無謗傷之橫至私門安燕絕災釁之潛生福逮親闈慶延子舍

代陸和叔青詞

妙道淵微非凡塵之可測圓穹杳邈有誠信之能通輒伸悃悞之私上瀆高明之聽竊念臣叨司三局從事六官勤勞更歷於歲終修省不忘於夙夜昨於正旦嘗啓願心許大醮之祈禳乞靈庇之保護今逢誕

日恭按科文集道侶於壇場列粹容於香火仰回聖
馭曲享清羞伏望上帝垂慈列神降祐延偏親之壽
考茂合族之禧祥三考書成祈有更代之慶百神來
相俾無災滯之虞

齋詞

同天節功德疏

天貽明德用昭通駿之聲卦應純乾實紀誕彌之日
仗法緣之有感祈聖壽之無疆恭惟 皇帝陛下生
知堯舜之資力致商周之業神功特起聖治日新人
皆樂生物亦遂性惟時慶節共罄丹誠用同東土之
陵之崇壽齊箕翼之永

興龍節功德疏

明星出而前佛降黃河清而聖人生仰企至仁同符
大覺虔修法會上祝鴻休伏願 皇帝陛下先天不
違順帝之則清臺考象候南極之老人浩劫紀年配
西方之壽佛更鈞餘祉普及函生

又

長發其祥已誕膺於眷命至仁者壽本無待於禱祈
爰假佛慈以申民頌伏願 皇帝陛下上德不德日

身外夕生夕集 卷之二十一
新又新既醉陳詩具太平之五福無逸作監繼迪哲
於四人普願由生咸均景福

散淨獄道場疏

民知榮辱自銷五過之疵政格平和遂弛萬人之獄
今者國家閒暇囹圄空虛雖仰荷於帝仁亦陰資於
神聽是用集祇園衆啓大法筵盪滌餘氛拔升宿滯
此則妙音普贊勝果大圓振九泉冤枉之魂作萬古
清涼之地扉生茂草氣召太和歲常獲於豐登民永
躋於仁壽

裝背羅漢薦歐陽婦疏

大覺現身本無實相應真隨感分化他方指安養之
歸途破阿鼻之疾苦當五代末有禪月大師以詩句
爲佛事以丹青爲道場名高身隱寓西蜀以杜門道
契神交夢天台之飛錫故留真跡以鎮淨方今有禮
部員外郎歐陽學士爲其亡女十四娘捨所服用重
別裝新禮部尚書蘇端明親製頌文更加題贊伏願
亡女歐陽氏善根不墜惡趣永離冤親兩忘福慧雙
證

惠州薦朝雲疏

千佛之後二聖爲尊號曰樓至如來又曰師子吼佛

以薄伽梵力爲執金剛身護化諸方大濟羣品爲閔
海隅之有罪久注河源之棲禪屢顯神通以警愚濁
今茲別院實在豐湖像設具嚴威靈如在軾以罪責
遷於炎荒有侍妾王朝雲一生辛勤萬里隨從遭時
之疫邁病而亡念其恐死之言欲託棲禪之下故營
幽室以掩微軀方負免瀆精藍之愆又虞驚觸神祇
之罪而旣葬三日風雨之餘靈迹五蹤道路皆見是
知佛慈之廣大不擇衆生之細微敢薦丹誠恭修法
會伏願山中一草一木皆被佛光今夜少香少花遍
周法界湖山安吉墳墓永堅接引亡魂早生淨土不

論幽顯凡在見聞俱證無上之菩提永脫三界之
宅

葬枯骨疏

諸佛衆生皆具大圓覺天宮地獄同在一剎塵是故
惡念才萌便淪苦海善根瞥起已證法身要在攝心
易同反掌竊見惠州太守左承議郎詹使君範與在
州官吏奉行朝典支破官錢葬埋無主暴骨數百體
旣掩覆其形骸復安存其魄識使歸泉壤別受後身
某目覩勝緣輒隨喜事以佛慈悲誓願力以我廣大
平等心尊釋迦之遺文修地藏之本願起焦卮之教

法設梁武之科儀伏願諸佛子等乘此良因離諸苦
趣沐浴法水悟罪性之本空鼓舞梵音知道場之無
礙三飯已畢莫起邪心一飽之餘永無饑火以戒定
慧滅貪嗔癡勿眷戀於殘軀共逍遙於淨土伏乞三
寶俯賜證明

薦雞疏

罪莫大於殺命福無過於誦經某以業緣未忘肉味
加之老病因此膏黎每翦血毛以資口腹懼罪修善
施財解冤爰念世無不殺之雞均爲一死法有往生
之路可濟三塗是用每月之中齋五戒道者莊悟空
兩日轉經若干卷救拔當月所殺雞若干隻伏望佛
慈下憫微命令所殺雞永離湯火得生人天

施餓鬼文

鬼趣多餓仁者當念濟之以錫若鉄爲斛受一二升
每晨炊熟取飯滿斛蓋覆着淨處至夜重鎔令熱透
并一盞淨水呪施能不食酒肉固大善不能當以淨
水漱口誦淨口業真言七遍燒香呪云佛弟子某甲
夜夜具斛食淨水供養一切鬼神仍誦般若心經三
卷破地獄三偈共二十一遍又呪云願此飯此水上
承佛力下承某甲福力願力變少爲多變粗爲細變

元為淨願佛弟子等飲食此已永除饑渴諸障消滅
離苦即樂究竟成佛以手掬飯三之一散置屋上餘
不妨以食貧者水即散洒之要在發平等慈悲無求
心耳

南華寺六祖塔功德疏

朝奉郎提舉成都府玉局觀蘇軾先於紹聖之初謫
往惠州過南華寺上謁六祖普覺大鑒禪師而後行
又謫過海南遇赦放還今蒙恩受前件官再過祖師
塔下全家瞻禮飯僧設浴以致感恩念答之意為禳
災集福之因具疏如後

右伏以甯流嶺海前後七年契濶死生喪亡九口以
前世罪業應墮惡道故一生憂患常倍他人今茲北
還粗有生望伏願六祖普覺真空大鑒禪師示大慈
愍出普光明憐幼穉之何辜除其疾恙念餘年之無
幾賜以安閑某敢不自求本心永離諸障期成道果
以報佛恩無任激切依歸之至

虔州法幢下水陸道場薦孤魂滯魄疏

苦海瀰天佛為彼岸業風鼓浪法是慈航諸佛子等
久墮三塗備嘗萬苦不遇善友永無出期今者各於
佛前同發此願願除無始以來貪嗔惡念願發今日

東坡先生文集 卷之二十六
以後清淨善心願行行坐坐皈依佛皈依法皈依僧
願世世生生遠離財遠離色遠離酒既獲清涼之果
咸躋極樂之鄉普冀有緣皆證無漏

薦蘇子容功德疏

伏以自昔先君以來常講宗盟之好俯仰之間四十
餘年在熙寧初陪公文德殿下已爲三舍人之冠及
元祐際綴公邇英閣前又爲五學士之首雖凌厲高
躅不敢言同而出處大槩無甚相愧敢緣薄物以薦
一哀伏惟三寶證明

代張安道進功德疏

聖神示化弃黃屋以上賓凡庶何知抱烏號而永歎
不有崇薦曷伸悃誠故依妙湛之尊特設清淨之供
庶憑法力仰導真游神宗皇帝伏願永證佛乘圓成
道果儲神無極迨建梵釋之間卜世愈延跨越商周
之盛至於含識並暢天和

代毛正仲軍衙廳成慶土道場疏

揆日灼龜既鼎新而改造伐材度土遂雲集以經營
丁丁而勇於運斤索索而勞於縮版雖不經於衆口
慮有取於神恫幸銷覆壓之虞允獲躋寧之願原其
所賜敢昧於神是用命海角之禪那資大雄之妙蔭

身城先生外集卷之二十六
宣此五福之教慶乎百堵之成伏願天雨千花薰大
和於一切佛塵萬墨積遐福於無邊百穀豐登群生
帖泰上祝河沙之聖壽永瞻慧日之祥光式罄誠心
庶祈靈鑒

散慶土道場文

百神有相致大厦之斯成一國觀新潔盛儀而圖報
因命祇園之侶廣宣唄竺之文音湧海潮花紛天雨
今則誠心已格妙果斯圓祈法力之有加保皇圖而
永固物無疵癘民用平康仰惟在上之尊垂鑒由中
之信

二十六卷終

重編東坡先生外集卷第二十七

疏

密川請臯長老疏

安化軍據霍郎中陳郎中褚郎中宋駕部傅虞部喬
太傅及莒縣百姓侯方等狀乞請沂州馬鞍山福壽
禪院長老惠臯住持本縣三城院開堂說法者

右竊以山東耆宿言不足而道有餘膠西士民信雖
深而悟者少當有達識爲開群迷長老臯上人德宇
深醇慧目清淨一凝一鉢本來自在隨緣萬水千山
所至皆非住處願體衆心之切毋辭數舍之遙翻然

青來慰此勤想謹疏

齊州請確長老疏

蓋聞爲一大事因緣優曇時見傳吾正法眼藏達麼西來直指心源不立文字悟道雖由於自得投機必賴於明師齊有靈崑世稱王剎寔先聖啓封之國迺至人建化之方圖志具存叢林爲盛久虛法席學者何依旁採輿言守臣有請特降睿旨慎擇主僧詢于衆中無如師者宜念傳衣之囑仰答佛恩勿忘利物之心上資聖化不煩固避以稱寵休謹疏

修通濟廟疏

南國大川洞庭極險上游群祀通濟最靈實能關機陰陽宰制生死盛吸江吞海之氣有分風擘流之權舟橫中流如幕上之巢燕人依大庇若仰德之嬰兒自非無知孰敢不敬而此廟結構已久理葺正煩大招開濟之徒肇興重榮之役期成功於不日共徼福於來今

修法雲寺浴室疏

浴爲淨因佛所深讚以一念頃破塵垢緣於三際中獲妙湛樂永惟悉達嘗感此以受生爰遠跋隨亦因之而悟法本院規摹素陋年祀寢多方澡雪乎精神

或震凌乎風雨升堂入室未稱真游運水般柴殊淹
妙用新以革故今正是時施及受人亦俱功德

懺經疏

如來大藏起於四十二章過去妙心流出萬五千卷
前言具在後句分明縱有古佛六通難轉老婆一半
念我夙息見此本原悟萬善之同歸豈一法之敢捨
遍叅重譯盡發秘函全見摩尼珠悉證貝多葉作此
大事示諸有情稽首雙林之輪不負三聖之偈

杭州請圓照禪師疏

大道無爲入之必假聞見一毫頓悟得之乃離聰明
惟自在門真無礙法天降一雨徧浹羣生佛無二門
并歸真諦恭惟本師長老脫離當見灑落孤風其爲
已也如月行空無跡可踐其爲人也如金入範隨注
皆圓既不滯於一方豈肯違於衆欲而況淨慈古刹
錢氏福田代不乏傳人所信向閔矜善俗久蘄真駁
以來臨惻隱慈心願順群誠之再請

蘇州請通長老疏

指衣冠以命儒蓋儒之衰認禪律以爲佛首佛之粗
本來清淨何者爲律一切解脫寧復有禪而世之惑
者禪律相殊儒佛相笑不有正覺誰開衆迷成都通

東坡先生集卷之二十一
法師族本縉紳實西州之望業通詩禮爲上國之光
爰自幼齡綽有遠韻辭君親於方壯弃軒冕於垂成
自儒爲佛而未始業儒由律入禪而居常持律報恩
寺水陸禪院四衆之淵數三吳之會通願振法音以
助道化所爲者大無事於謙

樂語

密倅趙成伯室人生日致語

與其婦子同日故作戲

昔年占夢適當重九之佳辰今日獻香共祝千年之
遐筭慶婦姑之同日雜黃菊以稱觴殺雞已切於龐
翁剪髮敢資於陶母但某叨塵樂部忝預年家不揆

微才上陳口號

今朝壽酒泛黃花鬱鬱葱葱氣滿家但使唐兒歌一
曲莫嫌小國問長沙

徐州重陽宴黃樓致語

時大水已退

百川返壑五稼登場新成百尺之樓適及重陽之會
高高下下旣休舂鏞之勞歲歲年年共覩茱萸之美
恭惟知郡學士民人所恃憂樂以時度餘力而取羨
財因循災而成勝事起東郊之壯觀破西楚之淫名
賓客如雲來四方之豪傑鼓鍾隱地聳萬目之觀瞻
實與徐民長爲佳話

東坡先生文集卷之二十七
一時柱石壯嚴闔更值西風落帽辰不爲游從誇燕
子直將氣焰壓波神山川尚遶當時國城郭猶飄廣
陌塵誰凭欄干賞風月使君留意在斯民

寒食宴提刑致語

良辰易失四者難并故人相逢五斗徑醉况中年離
合之感正寒食清明之間時乎不可再來賢者而後
樂此恭惟提刑學士才本天授學爲人師事業存乎
斯民文章蓋其餘事望之已試於馮翊翁子暫還於
會稽知府學士接好隣邦締交冊府莫逆之契義等
於天倫不腆之辭意勤於地主方講兩君之好可無

七子之詩欲使異時爭傳盛事

雲間畫鼓疊春雷千騎尋芳戲馬臺半道已逢山簡
醉萬人爭看謫仙來淮西按部威先凜歷下懷仁首
重回還把去年留客意折花臨水更徘徊

太皇太后誕日致語

旋復陰陽配五支於六幹誕彌歲月與元日爲三申
神后降慶於當年曾孫效誠於茲且不煩巧曆自契
真無道俗謹謳天人協意太皇太后陛下功高任姒
德配唐虞上推願託之心下布仰成之政寶慈與儉
蹈光憲之成規却狄安邦襲烈武之餘慶三朝順履

萬壽惟新雖絳縣之老人難窮甲子如楚南之靈木
莫計春秋臣賤等草茅心傾葵藿採民謠於擊壤效
樂語之陳詩

媯皇得道自成仙金母長生不計年甲子會逢三朔
旦歲星行看百周天消兵漸覺腰無犢種德方知福
有田彤管何人書後會椒花椿頌一時編

集英殿春宴教坊詞

教坊致語

中和化育萬壽排場

人和則氣和故王道得而四時正今樂猶古樂故
心悅而八音平幸此聖朝陶然化國飭三農於保介
維莫之春興五福於太平旣醉以酒恭惟皇帝陛
下乘乾有作出震無私憲章六聖之典謨斟酌百王
之禮樂天方胙於舜孝人已誦於堯言故得彛倫叙
而水土平北流軌道壬人退而蠻夷服西旅在廷稍
寬中吳之憂一均湛露之澤方將翹夔群賢而惡旨
酒鼓吹六藝而放鄭聲雖白雪陽春莫致天顏之一
笑而獻芹負日各盡野人之寸心臣猥以賤工叨塵
法部幸獲望雲之喜敢陳擊壤之音不揆無才上進

口號

東坡先生集卷之二十一
萬人歌舞樂芳辰長養恩深第四春令下風雷常有
信時來草木豈知仁璿璣已正三堦泰玉館初知九
奏純更欲年年同此樂故應相繼得元臣

勾合曲

太平無象善萬物之得時和氣致祥喜八風之從律
大合鈞天之奏克諧治世之音上奉嚴宸教坊合曲

勾小兒隊

班白之老旣無負戴之憂齟齬之童亦遂嬉遊之樂
行歌道路聯袂闕庭仰奉宸慈小兒入隊

隊名

初成莫春服來獻太平謠

問小兒隊

聚戲里閭豈識九重之奧成文綴兆忽隨六樂之和
宜近彤墀悉陳來意

小兒致語

臣聞春爲陽中生物各遂其性樂以天下聖人豈私
其身故飲食盡忠臣心而遊豫爲諸侯度方遲日之
無事矧嗣歲之有年大啓璧門肅陳燕豆恭惟 皇
帝陛下道隆而德備質文而性仁摠攬群才盖天授
之神策澄清庶政故民獻以寶符願良辰樂事之難

并宜群臣嘉賓之合集廣場千步方山立於衆工大
樂九成固海涵於雜技臣等沐浴膏澤咏歌昇平幸
以髣髴之微得參舞羽之末敢干宸聽伏俟俞旨

勾雜劇

臚傳已久陞楯將更宜資載笑之懽少進群優之技
緩調絲竹雜劇來歟

放小兒隊

清歌屢奏蓋曲盡於下情妙舞載陳示不遺於小物
既畢沛風之和稍同沂水之歸再拜天階相將如
勾女童隊

燕私之樂下逮於臣工靡曼之觀聊同於俚俗審音
而作振袂稍前上奉宸歡

女童入隊

隊名

瑞日明歌扇仙飈動舞衣

問女童

工師奏技侍衛聳觀願游女之何施集彤庭而有待
欲知來意宜悉敷陳

女童致語

妾聞聖人授民以時王者與衆同樂故倉庚鳴而蚕
女出游魚躍而靈沼春蓋良辰豈易得哉亦賢者而

東坡先生文集 卷之二十一
後樂此伏惟 皇帝陛下溫恭允塞緝熙光明學無
常師文武識其大者仁能濟衆堯舜其猶病諸齊泰
階之六符走重譯之萬里天人並應禮樂將興豈惟
塵土之賤微敢度乾坤之廣大萬舞九奏雖未象於
成功間歌三終亦庶幾於頌德欲殫未技少效寸誠

勾雜劇

風斜御柳旣窮綺麗之觀日轉庭槐少進詼優之戲
再調絲竹雜劇來歟

放女童隊

翠袖風回已盡折旋之妙文茵霞卷尚觀顧步之餘

再拜天墀相將好去

朝雲生日致語

人間五日知織女之暫來海上三年喜麻姑之未老
事協紫函之夢歡傾白髮之兒好人相逢一杯徑醉
伏以某人女郎蒼梧仙裔南海真餘憐謝端之早孤
潛炊相助知張鎬之沒興遇酒輒飲采楊梅而朝飛
擘青蓮而暮返長新玉女之年貌未厭金膏之掃除
萬里乘桴已慕仲尼之航海五綵綉鳳將隨老子以
俱仙東坡居士樽俎千峰笙篳萬籟聊設三山之湯
餅共傾九醞之仙醪隨風而來苒天香之引步此興

不淺烟江月之升樓羅浮山下已三春松筍穿塔畫
掩門太白猶逃水仙洞紫簫來問玉華君天容水色
聊同夜髮澤膚光自鑿人萬戶春風爲子壽坐看滄
海起揚塵

白鶴新居上梁

鶯城萬室錯居二水之間鶴觀一峰獨立千崑之上
海山浮動而出沒仙聖飛騰而往來古有齋宮號稱
福地鞠爲茂草庵宅狐狸物有廢興時而隱顯東坡
先生南遷萬里僑寓三年不起歸歎之心更作終焉
之計越山斬木泝江水以北來一邑爲隣遶牙檣而

南峙送歸帆於天末掛落月於床頭方將開逸少之
墨池安稚川之丹竈去家千歲終同丁令之來歸有
宅一區聊記楊雄之住處今者旣興百堵爰駕兩楹
道俗來觀里閭助作願同父老宴鄉社之雞豚已戒
兒童惱比隣之鶯鴨何辭一笑之樂永結無窮之懽
兒郎偉拋梁東喬木叅天梵釋宮盡道先生春睡美
道人輕打五更鍾

兒郎偉拋梁西嫋嫋虹橋跨碧溪時有使君來問道
夜深燈火亂長堤

兒郎偉拋梁南南江古木蔭回潭共笑先生垂白髮

舍南親種兩株柑

兕郎偉拋梁北北江江水搖山麓先生親築釣魚臺
終朝弄水何曾足

兕郎偉拋梁上璧月珠星臨蕙帳明年更起望仙臺
縹緲空山隘雲杖

兕郎偉拋梁下鑿井踈畦散隣社千年枸杞夜長號
萬丈丹梯誰羽化

伏願上梁之後山有宿麥海無颶風氣爽人安陳公
之藥不散年豐米賤林婆之酒可賒凡我往還同增
福壽

梁會殿上梁文

經來白馬寺僧到赤烏年自此佛法大行以至海隅
皆滿伏惟我海會禪師施無盡藏開不二門來作西
方之主人且爲東坡之道友爰因勝地以建道場有
大富長者八人造釋迦寶像一所瑤堦肪截碧瓦鱗
差庶幾鷲嶺之雄豈特鷲湖之冠共憑佛力仰祝堯
年如日之昇與天無極舉城僚友闔郡士民皆興有
作之慈共享無邊之福

兕郎偉拋梁東日出三竿照海紅作禮禪師爲祖席
東坡請到雪髯翁

兒郎備拋梁西此去西方路不迷一禮慈尊無量壽
萬年天子與天齊

兒郎備拋梁南南海薰風動碧潭過盡千帆并萬舶
歸來金鼓結珠龕

兒郎備拋梁北玉輦巍巍天北極侯門鼓吹到山門
爲作龍興千萬億

兒郎備拋梁上瑞氣葱葱陰龍象初師舉足不須踏
踏着毗盧惡模樣

兒郎備拋梁下禮足闍黎來請出玉葉花開到處香
千燈光照何曾夜

伏願上梁以後年豐米賤氣爽人安郡侯日轉千階
施主日增萬鎰果有雲散錢寶星飛各務紛拏共爲
笑樂

判

判悴酒狀

道士某面欺主人旁及鄰坐側左元方之盞已自厚
顏傾西王母之杯宜從薄罰可罰一大青醅

重編東坡先生外集卷之二十七終

重編東坡先生外集卷之二十八

祝文

常山祈雨文

吏實不德無以導迎順氣消復災沴惟神之求神亦
閱其不才而嘉其勤凡有告請靡所不荅乃者有謁
于神卽退之三日時雨周洽去城百里而近蝗獨不
生凡我吏民孰不歸德于神而一雨之後彌月不
繼百里之外蟻生如初豈神能應於前不能應於後
能卹其近不能卹其遠盖吏不稱職政刑失中戾于
民心以不能終神之賜而州之民比歲饑殍凋殘

之餘不復堪命若又不熟則流離之禍其莫知所止
矣神之聰明其忍以吏不稱職之所致而不卒救之
歟今夏麥垂登而秋穀將槁若時賜霽澤驅攘蟲災
以完我西成之資歲秋九月當與吏民復走廟下上
饗

徐州禱靈慧塔文

武寧軍今爲黃河決溢流入淮泗圍浸州城踰月不
退一州吏民同發至誠仰告真寂大師化身靈塔願
垂慈愍密賜護持馳除陰雲疏導積水若十日之內
水退城全當具靈異事迹申奏朝廷乞加謚號使

方士庶永遠皈依

又

徐州本州近以河水爲患禱於真寂大師之塔靈應
響答十日之內果獲減退方議聞奏乞加謚號今者
兵夫數千功役垂畢而淫雨不止人力莫施地中水
潦無所決泄吏民告病敢辭再瀆伏望大師以法慈
神力驅攘陰沴速獲開霽以終大賜

又

徐州今爲冬溫無雪疾疫將興宿麥在田膏澤不繼
民旣告病吏何以安是用潔誠齋居稽首仰訴恭惟

真寂大師道齊無上士運繼普光王遍智難名便門
無量向者屢持微懇上瀆洪慈消暴水於滔天開積
陰於及掌本州已具靈異事迹奏乞師號塔名伏望
大師益運神功力回旱勢賜以一尺之雪仍爲五日
之期使此方民愈加恭信某等無任虔誠激切之至
告賜靈慧謚號塔名文

徐州奉敕本州乾明寺真寂大師宜特追賜號靈慧
大師塔曰靈慧之塔者伏以至人無心而因緣有地
妙法常住而隱顯以時非我凡庸所能量度恭惟靈
慧大師佛慈所付願力至深現身淮南度越千里而
應化於此涅槃唐世號涉五代而易名於今旣奉詔
書一新謚號神人交慶道俗知歸非獨永庇彭城一
方之民殆將追繼普光千劫之化惟願益開悲智不
倦禱求潜消水旱之萌以稱聖明之意

告謝靈慧塔文

至誠默運大庇一方之民微雪應祈稍蘇百日之旱
恭持薄禮少答鴻私惟願力之無邊庶陰雲之繼作
先春而降盈尺爲期

祈雨霧猪泉文

噫噎我民何辜於天不水則旱于今二年天未悔禍

百日不雨雪不斂塵麥不盖土天子命我禱于山川
側聞此山神龍之淵躬拜稽首敢丐一勺得雪盈尺
牲酒是酢

祈雪文

水旱輒求惟吏之差有求不倦惟神之休乙卯之雪
膚寸而已如燔輿薪救以勺水嘉穀旨酒旣謝且祈
願終其賜盈尺爲期

祭勾芒文

夫帝出乎震神實輔之茲日立春農事之始將平秩
於東作先恭授於人時乃出土牛示以早晚惟神

祐之

明堂祭諸廟文

天子宗祀明堂澤及幽顯敷天之下徧于群神德庇
方州位昭祀典是用肅將昭意以格神休

杭州禱觀音祈晴文

三吳之災連歲不稔尚賴朝廷之澤大分倉廩之陳
乃眷疲羸僅免流殍今者淫雨彌月秋成半空永惟
嗣歲之憂將有流離之懼我大菩薩行平等慈觀此
衆生皆同赤子反雨暘於指顧化豐歉於斯須雖某
等不德而召災念斯民無辜而可憫願興慈力一拯

身城夕生夕集
卷之二十八
四
合生

觀音堂謝晴文

民無常心固何知於帝力天作淫雨當有感於佛慈
慧光照臨陰沴消伏拯農工於溝壑責吏責於簡書
某等共銜不報之恩願頌難名之德躬馳梵宇少薦
微誠

祈晴佛陀波利塔文

昭告于佛陀波利大士之塔積雪始消陰沴再作小
民無辜敝于饑寒草木昆蟲悉罹其虐並走羣望祈
而未報意雨霽有數非神得專惟我大士合法分無
爲不入塵數願以大解脫力作不思議事愍此羣
豁然開明盡二月晦雨雪不作大拯羸餓以發信根
此大布施實無限量惟大士念之

祭勾芒文

春律旣應農事將作爰出土牛以爲耕候維爾有神
實左右之雨暘以時螟螣不作以克有年敢忘其報
禱雨天竺觀音文

我大菩薩爲世導師救危難於三塗化清涼於五濁
比者官吏不德刑政失中故此驕陽害我天物具官
某上承府檄傍採民言共奉安輿願登法座伏願江

海貢潤龍天會朝布爲三日之霖適副一邦之望

禱龍水文

雲布多峰日有焚空之勢雨無破塊人懷暘虐之憂
雖累叩於明靈終未懷於通感府主舍人存心爲國
俯念輿民燃香霽以禱祈對龍湫而懇望伏願明靈
敷感使雨澤以旁滋聖化荐臻致田疇之益濟

祈晴文

常平之政覩歲美惡操其羸虛以馭農末秋穀未登
已食其陳嗣歲之虞當歛其新迨茲秋暘載穫載登
陰雨害之稽人罔功我發庫粟以實高廩盍勅雨官

遏止其霑旣曠我場萬杵皆作待此坻京援我溝壑
丕顯大神雨霽在予匪民焉依其忍弗圖

謝晴文

天作淫雨害于衆盛蒙神之休猶得中熟薄奠匪報

武昭廟誠

祈晴文

均糴之法著于甲令視歲豐凶以馭重輕歲且中熟
雨則害之如此失時公私交病神食此土民命係焉
無俾歉荒以作神羞

祈雨文

東坡先生文集 卷之二十八 六
六月不雨乃時之常或霖或霽於稼則傷稼將有秋
民饑所望其也不德守此一方罪在守臣無俾民殃
人不能神易雨而賜神其聽之庶乎降康

謝雨文

農事告成旱魃爲沴寢惟焦爍之害遂稽收刈之勤
自非降靈大庇群俗以下膏澤之賜庶有豐盈之期
寔獲助之使然豈愚誠之能致是用特臨神宇再款
眸容輒傾瀾潔之誠仰答靈威之祐

秋賽祝文

惟神聰明爲民依庇宜秩典禮欽奉靈祠况農事之
肇興賴神靈之降宥一邦蒙惠已膺風雨之時百
有嚴將厚秋冬之報

又

惟神光昭祀典幽贊化功享廟食以惟嚴垂介福而
無爽屬茲豐歲爰舉舊規式陳蠲潔之儀冀報有年
之慶

告五嶽文

相天以育物者五方之帝也配地以作鎮者五岳之
神也天爲真君帝爲真宰五嶽者三公之象也軾叨
受朝寄出守藩土神不虐罰民有豐歲敢用告成以

謝靈貺

告宣聖文

嗟嗟元王三代之英言不鈞用於一君而爲無窮之遺教身不寵利於一時而有不朽之餘榮嗟嗟元王以道而鳴肆筆成書吐辭爲經炳然不渝言若丹青久而愈盈聲非雷霆瞽者可以使剔目而駭視瞶者可以使扶耳而奔驚柰何轍環天下卒老於行載空言於典冊示後世之儀刑回狂瀾於旣倒支大厦於將傾揭日月之昭昭破陰氛之冥冥嗟乎一氣之不和與萬物之至精或爲淮夷之蠙珠或爲雲漢之

星雖光輝之成彩未離乎聚散以流形豈若王之德愈久而彌明曄曄而華涵涵而停融而在天者爲雲漢之文章結而在地者爲山岳之英靈詭然如龍翔而鳳躍純乎如玉振而金聲嗟嗟元王德博難名某奉王命撫臨邊城畝有滯穗境無交兵鳴玉載道紛袍在庭有踐邊豆有豐粢盛敢用昭薦享于克誠

告顏子文

志不行于時而能驅世以歸仁澤不加于民而能顯道以修身德無窮通古難其人惟公能之絕世離倫富貴不義視之如雲飲止一瓢不憂其貧輸教孔子

東坡先生文集 卷之二十一
門人益親血食萬世配享惟神敢不昭薦公平有聞
祭文

祭劉原文

嗚呼古稱益友多聞諒直有一而已罔全其德惟公
兼之肅然有餘惟其至明以有衆無譬如鑑然物至
而受罔有不照斯以爲富先民之言久遠絕微繼以
百家其多如茨衆人劬勞有不能獲公徐收之其羸
則百瀦之爲淵散之爲川拙之無窮循之無端有聽
其言茫然自失如江河注漂蕩汨滴有讀其書釋然
解頤紛紜雜亂言得其歸其博無際其辯無偶

旣辯又以約守昔公在朝議論 倫挺然不回其氣
以振談笑所排諷諭所及大夫士庶歛衽以服自公
之亡未幾于茲學失本原邪說並馳大言滔天讒論
蔑世不謂自便曰固其理豈不自有人或歎嘻孰能
誦言以告其非公自平昔灼見隱伏指擿譏諛俾不
克立公歸于原誰與正之酌以告哀莫知我悲

祭韓獻肅公文

在昔仁祖清淨養民維時忠獻秉國之鈞盛大蕃衍
啓其後人公暨叔季文武彬彬公相神宗重厚有體
心存社稷輔以詩禮陸博堂堂扶陽濟濟公將于外

鍼鉞雕戈虔共匪懈柔惠不可韓侯奕奕申伯番番
大明既升克紹聖考介圭來朝黃髮元老帝曰汝留
王公是保公勇於退連章告歸三公就第大政是咨
五福具有謂當期順天弗愆遺哲人其萎哀動兩宮
士夫涕洟維此僚寮拜公京師從容暇日引陪燕私
話言在耳已哭于帷在公已矣邦國之悲靈輶啓行
宅兆有期寓馬塗車立列參差舉觴一慟與公長辭

祭范夫人文

惟夫人婦德茂於閨門母儀刑於里閭篤生賢子綽
有令名將期百年兼享五福而天不亮孝子之志

不祐善人之門變故之來旬日相繼尚有餘慶鍾於
後昆葉忝與外姻局於官守聊馳薄奠遠致哀誠

祭道婦歐陽氏文

昔先君與太師文忠公恩義之重宜結婚姻以永世
好故予以中子追求婚於汝自汝之歸夫婦如賓娣
姒諧睦事上接下動有家法謂當百年治我後事云
何奄忽一日至此使我白首乃反哭汝命也柰何嗚
呼哀哉以吉月良日殯汝于京城之西惠濟之僧舍
汝之魄識復反于家尚克朝夕受予奠餽凡汝服用
皆施佛僧上享

東坡先生文集卷之二十八
祭古塚文

閏十二月三日予之田客築室於所居之東南發
一大塚適及其頂遽命掩之而祭之以文曰

茫乎忽乎寂乎寥乎子大夫之靈也子豈位冠一時
功逮宇內福慶被于子孫膏澤流於萬世春秋逝盡
而託物於斯乎意者潛光隱耀却千駟而不顧祿萬
鍾而不受品居而水隱雲卧而風乘志身徇義而遺
骨於斯乎豈吾固嘗誦子之詩書慕子之風烈而不
知其謂誰歟子之英靈精爽與周公呂望遊於豐鎬
之間乎抑其與巢由伯夷相從於首陽箕頰之上乎

塲何爲而華乎壙何爲而大乎地何爲而勝乎子非
隱者也子之富貴不獨美其生而又有以榮其死也
子之功烈必有石以誌其下而余莫之敢取也昔子
之姻親族黨節春秋悼霜露雲動影影從享祀乎其下
今也僕夫樵人誅菹鑿土結廬乎其下昔何盛而今
何衰乎吾將徙吾之宮避子之舍豈惟力之不能獨
將何以勝夫必然之理乎安知百歲之後吾之宮不
復爲他人之墓乎今夫一歲之運陰陽之變天地盈
虛日星殞食山川崩竭萬物生死歛吸飄忽若雷奔
電掣不須臾留也而子大夫獨能遺骨於其間而又

東坡先生文集 卷之二十八 十一
惡夫人之居者乎嗟彼此之一時邈相望於山河子
爲土偶固已歸於土矣余爲木偶漂漂者未知其如
何魂而有知爲余媿阿

祭伯父提刑文

治平元年

嗚呼昔我先祖之後諸父諸姑森如鴈行三十年間
死生契濶惟編禮與伯父千里相望宦遊東西奔走
四海去家如忘至有生子成童而不識者茲言可傷
方約退居卜築相與終老逍遙翺翔嗚呼伯父一旦
捨去有志弗償辛丑之秋送伯西郊淫雨蕭蕭河水
滔滔言別于槁屢顧以招孰知此行乃隔幽明嗚呼
伯父生竟何爲勤苦食辛以律厥身知以爲民不知
子孫今其云亡室如懸筐布衣練裙冬月負薪誰爲
優孟悲歌叔孫惟有斯文以告不泯

祭老泉焚黃文

元豐元年

乃者熙寧七年十月上再有事于南郊告成之慶單
及幽顯我先君中允贈太常博士累贈郡官負外郎
軾轍當奔走兆域以致天子之命王事有程不敢言
私謹遣人賫告黃二軸集中外親擇日焚納西望隕
涕之至

東坡先生外集卷第二十九

序引說

獵會詩序

雷勝隴西人以勇敢應募得官爲京東第二武將膂力絕人騎射敏妙按閱於徐徐人欲觀其能爲小獵城西又有殿直鄭亮借職繆進者皆騎而從弓矢刀槊無不精習而注泊黃宗閔舉止如諸生戎裝輕騎出絕馳衆客皆驚笑樂甚是日小雨甫晴土潤風和觀者數千人曹子桓云建安十年始定冀州滅貊貢良弓燕人獻名馬時歲之春勾芒司節和風扇物弓

東坡先生文集卷之二十九
操手柔草茂獸肥與兄子丹獵於鄴西手獲獐鹿九
狐兔三十馳騁之樂邊人武吏日以爲常如曹氏父
子橫槊賦詩以傳於世乃可喜耳衆客旣各自寫其
詩因書其末以爲異日一笑

八境圖詩序

南康八境圖者太守孔君之所作也君旣作石城卽
其城上樓觀臺榭之所見者而作是詩也東望七閩
南望五嶺覽羣山之參差俯章贛之奔流雲烟出沒
草木蕃麗邑屋相望鷄犬之聲相聞觀斯圖也可以
茫然而思粲然而笑慨然而歎也蘇子曰此南康之
一境也何從而八乎所自觀之者異也且子不見夫
日乎其旦如盤其中如珠其夕如破壁此豈三日也
哉苟知夫一之爲八也則凡寒暑朝夕雨暘晦明之
異坐作行立哀樂喜怒之變接於吾目而感於吾心
者有不可勝數者矣豈特八乎如知夫八之出乎一
也則夫四海之外恢詭譎怪禹貢之所書鄒衍之所
談相如之所賦雖至千萬未有一者也後之君子
必將有感於斯焉乃作詩八章題之圖上云

送通教錢太師還杭詩序

熙寧十年始有詔以杭州龍山廢佛祠爲表忠觀碑

東坡先生集卷之二十九
具載其事元豐二年六月通教自杭來見予於吳興
問觀已卒工乎曰未也杭人比歲不登莫有助我者
余曰異哉杭人重施而輕財好義而徇名是獨爲福
田也將自託於不朽今歲稔矣子其行乎通教還杭
作詩以送之

思子臺賦引

予先君宮師之友史君諱唐臣字彥輔眉山人與其
弟沆子凝皆奇士博學能文慕李文饒之爲人而學
其議論彥輔舉賢良方正不中第子凝以進士得官
止著作佐郎皆早歿且無子有文數百篇皆亡之子
少時嘗見彥輔所作思子臺賦上援秦皇下逮晉惠
及復哀切有補於世蓋記其意而忘其辭乃命過作
補亡之篇庶幾後之君子猶得見斯人胸懷之髣髴
也

聖散子後序

聖散子主疾功效非一去年春杭之民病得此藥全
活者不可勝數所用皆中下品藥畧計每千錢卽得
千服所濟已及千人由此積之其利甚溥凡人欲施
惠而力能自辦者猶有所止若合衆力則人有善利
其行可久今募信士就楞嚴院修製自立春後起施

東坡先生外集 卷之二十九
三
直至來年春夏之交有人名者徑以施送本院昔薄
拘羅尊者以一訶梨勒施一病比丘故獲報身身常
無衆病施無多寡隨力助緣病疾必相扶持功德豈
有限量仁者惻隱當崇善因吳郡六廣秀才施此方
并藥得之於智藏主禪月大師寶澤乃鄉僧也其六
廣見在京施方并藥在麥麴巷居住

送水丘秀才序

水丘仙夫治六經百家說爲歌詩與揚州豪俊交游
頭骨礪然有古丈夫風其出辭吐氣亦往往驚世俗
予知其必有用也仙夫其自惜哉今之讀書取官者
皆屈折拳曲以合規繩曾不得自伸其喙仙夫耻不
得爲將歷瑯琊之會稽浮沅湘溯瞿塘登高以望遠
搖槳以泳深以自適其適也遇予而語行予謂古之
君子有絕俗而高有擇地而泰者願其心常足而坐
於廟堂君臣賡歌與夫據槁梧擊朽枝而聲犁然不
知其心之樂奚以異也其在窮也能知舍其在通也
能知用予以是卜仙夫之還也仙夫勉矣哉若夫習
而不試往卽而獨後則仙夫之屐可以南矣

江子靜字序

東坡先生外集 卷之二十九
友人江君以其名存之求字於余余字之曰子靜夫
人之動以靜爲心主神以靜舍心以靜充志以靜寧
慮以靜明其靜有道得已則靜逐物則動以一人之
身晝夜之氣呼吸出入未嘗異也然而或存或亡者
是其動靜殊也後之學者始學也旣累於仕其仕也
又累於進得之則樂失之則憂是憂樂係於進矣平
旦而起日與事交合我則喜忤我則怒是喜怒係於
事矣耳悅五聲目悅五色口悅五味鼻悅芬臭是愛
欲係於物矣以眇然之身而所係如此行流轉徙日
遷月化則平日之所養者尚安能存耶喪其所存尚
安能明在已之是非與夫在物之真僞哉故君子學
以辨道道以求性正則靜靜則定定則虛虛則明物
之來也吾無所增物之去也吾無所虧豈復爲之忻
喜愛惡而累其真與若齒少才銳學以待仕方且出
而應物所謂靜以存性不可不念也能得吾性不失
其在已則何徃而不適哉

文驥字序

馬之於德力盡於蹄齧智盡於竊啣詭轡以蹄齧之
力爲千里以竊詭之智爲道迷此之謂驥文與可學
士之孫逸民秀才之子蘇子由侍郎之外孫小名驥

孫因名之曰驥不稱其力稱其德字之曰元德元祐三年外伯翁東坡居士書

東坡居士言驥孫才五歲入吾家見先府君畫像曰我嘗見於大慈寺中和院試呼出相之骨法已竒神氣沉穩此兒一日千里吾輩猶及見之他日學問知驥之在德不在力尚不辜東坡之言元祐三年十月癸酉門下後省書

何苓之名說

羅浮道士何宗一以其猶子為童子壯貌肥黑矮小予嘗戲之曰此羅浮茯苓精也俗諺曰下有茯苓上生兔絲因名之曰苓之字表絲且祝老何善待之長非庸物也

恩聰名說

法惠圓師小童彭九年十一善琴應對明了如成人自言未有法名而同師皆聯思字遂與名思聰庶幾它日因聲以得法仍書以付之

烏說

烏於人最黠伺人音色有異輒去不留雖捷矢巧彈不能得其便也閩中民狃烏性以謂物無不可以性

東坡先生集 卷之二十一
取者則之野挈壘飯楮錢陽哭冢間若祭者然哭竟裂錢弃飯而去烏則爭下啄啄盡哭者復立它冢烈錢弃飯如初烏不疑其給也益鳴爭乃至三四皆飛從之稍狎迫于羅罔舉獲其烏焉今夫世之人自謂智足以周身而不知禍藏於所伏者幾何不見賣於哭者哉其或不知周身之術而以愚觸歿則其爲智猶不若烏之始靈於彈鞞非作說難歿於秦天下哀其以智歿楚人不知說難而謂之沐猴天下哀其以愚歿二人者其爲愚智則異其於取歿則同矣武子邦有道則智邦無道則愚觀時而動旣可及哉

二魚說

予讀柳子厚三戒而愛之又嘗悼世之人有妄怒而招悔欲益而彌彰者遊吳得二魚於海濱之人亦似之作二魚說非意乎續子厚者亦聊以自警云

河之魚

河之魚有豚其名者游於橋間而觸其柱不知違去怒其柱之觸已也則張頰植鬣怒腹而浮之水火之莫動飛鳶過而攫之磔其腸而食之好游而不知止因游以觸物而不知罪已乃妄肆其忿至於磔腹而

東坡先生外集
卷二十九
一
妖可悲也夫

海之魚

海之魚有烏賊其名者啣水而水烏戲于岸間懼物之窺已也則啣水以蔽物烏疑而視之知其魚也而攫之嗚呼徒知自蔽以求全不知滅迹以杜爲識者之所窺哀哉

重編東坡先生外集卷第二十九終

